

Eliñolo ku HEBELU Okulimukisa

Amaywi a Nyambe Okubitela mwa Mwanaye

¹ Mu tinako ni mu mikwa no kupula Nyambe kame ana kwambanga na sitetu naku kale okubitela mwa anuhi aye,

² kono mu tinako tino no mamananeno, kame aamba kwaaci mwa Mwanaye woyo abekile oku yola einu yonje, woyo kame mwa yonyene kame anatende elitunga.

³ Yokame woyo omonisa ekanya ya Nyambe ni sifekiso esi ali mwa sonyene, kame a shimba einu yonje mu liywi no maata aye. Aba ana kumana okukenisa eibi, sebeli oikala ku lyooko no silyo lya Nyambe no maata onje naku wilu.

Okuneneba kwa Mwana Nyambe

⁴ Kakuli yo bita amangeloi ku maata no kuneneba, simba elitina elyo ana biwi ni lya utokwa onene okubitelela oo.

⁵ Kakuli ku lingeloi li bine eli a naamba Nyambe nji,

“Tiwe Mwanange,

balelo kame nina futuka Sitowe.”

Simba kame libine elingeloi eli anambebele Nyambe nji,

“Kame sani tende Sitowe,

mi yonyene kame satende Mwanaye.”

⁶ Mi kame aba sa lite mwanaye no mweli mu litunga, sebeli wamba nji,

“Mulesele amangeloi onje a Nyambe amu lumbeke.”

7 Nyambe ku mangeloi onje kame ana kwamba
nji,

“Anyine otenda amangeloi aye emebo,
mi abika aye kame aatenda amalimi no
mulilo.”

8 Kono kwa Mwanaye kame aamba nji,

“Olubona lowe, wene Nyambe, ni lwakuta oku no
kwaabwa!

Omulamu wowe Mbumu no kuluka omu-
lamu no mubuso wowe no kuluka.

9 Kame osinga esi no kuluka, mi kame otimbile eyi
no kwaluka.

Abo cwale Nyambe, Nyambe wowe, kame ana
waa wene

ni maati no ku wabelelwa onene,
kame oli beulu no alikani.”

10 Kame sebeli wamba nji,

“Weene, Mbumu, ku matatekelo kame ona ku-
umba elitunga,

mi amawilu kame atendile omusebezi no
maoko owe.

11 Eyo yonje mba ibu, kono wene mbusiyala,
yonje mba ikulubala kanyi esikumango.

12 Mbu ipungu kanyi mukanjo,
mi mbai futuka.

Kono wene mbusiyala kanyi omo oikalele,
mi emyaka yowe ka itamba kubwa.”

13 Kono ku mangeloi libine anambeke nji,

“Oikale ku lyoko lyange no silyo,
oku twala abo sa ni tende eiila yowe
esipula no malyatelo no makondo owe.”

¹⁴ Kasanji onje amangeloi kame atendile emebo eyi isebeleza Nyambe, eyi itumiwangwa oku sebeleza awo sawane okuyoyisiwa?

2

Okuyoyisiwa no Kuneneba

¹ Mulibakaelyo, kame tu fanena oku tokomela onene eyi tu na yupu, nji cwale tusele okutundamo.

² Kakuli nji elinusa linambiwa ku mangeloi neli lya niti, mi onje awo ana kuulwa oku li kuteka ni ku likana nakuwana ekoto ina kwaafanena.

³ Ngasibine satu banduke nji tu keshebise okuyoyisiwa no kuneneba oko? Na likwambiwa oweli kwa Mbumu, mi na tuku lyambeliwa kwaawo ana kwiwupa kwa yonyene.

⁴ Nyambe niyonyene sebeli oongoteteta okuba oupaki woo mu isupo ni mu timakazo ni inu no kukomokisa mu timpo no Mebo No Kukena titabiwa okukumanena nomu asingela yonyene.

Woyo Otu Twaletela ku Kuyoyisiwa

⁵ Kakuli kasa ku mangeloi oko Nyambe ana ku beeka elitunga elyo liiya, elyo twamba.

⁶ Nai kwambiwa kunjili nji,
“Omunu anyine nji umu puluke,
Simba omwana munu anyine, nji umu babalele?”

⁷ Kame ona mubi okwikala kunji no mangeloi enako icana,
kame onamu fuku ekuwani no kanya neyi noku kutekiwa,

⁸ mi kame obeeka einu yonje kunji no makondo aye.

Cwalehe, aba abekile einu yonje munji yaye, ka si siya esinjii esi aulwile oku beeka mu maata aye. Nabakulingeso, katu simona kale nji einu yonje kame ili mu maata aye.

⁹ Kono kame tu mona Jesu, yonyene woyo ona ku bekiwa ba nako icana kunji no mangeloi, mulibaka no lifu ana yupu okukola kwalyo, kame afukilwe ekuwani no kanya ni likute mulibaka no ku yandela elifu, nji cwale mulibaka no sishemo sa Nyambe, na fele aanu onje.

¹⁰ Kakuli kame kuna kulukela nji Nyambe okubitela mwa yonyene ni kwa einu yonje iikaleko, mukulita aana no kupula mu kanya abo okubitela mu muyando aye, mbaa tweletele mukuyoyisiwa no niti.

¹¹ Kakuli yonyene osi kukenisa nawo asiku kenisiwa, onje Sitoo ni mumweya. Mulibakelyo ka ene okwaa isana abaange.

¹² Cwale aba aamba nji,

“Kame sa nambele abaange elitina lyowe,

Kame saniyeme wene mukaci no mukopano.”

¹³ Mi kame sebeli wamba nji, “Kame sa ni mu sepe.” Mi kame sebeli wamba nji, “Ya mene uno, naana ana nibi Nyambe.”

¹⁴ Cwalehe abo aana omu aku tabela mu lutu ni mu unyinga, mu mukwanongeso ni yonyene nashimbi kuunu ukufekile, nji cwale mu lifu lyaye asinye woyo oli ni maata no lifu, yonyene diyabu-lozi,

¹⁵ mi aliulule aanu onje awo ana ku yoya omoyo woo wonje mu ubika no kucila elifu.

¹⁶ Niti luli kasa mu ku tusa amangeloi, kono kame aneyi mu kutusa olusika lwa Abulahama.

¹⁷ Mulibakelyo neli nji afanene okutendiwa kanyi ainaye mu likute lyonje, nji cwale atende omupulisita munene no makeke ni kusepahala mu sebelezo ya Nyambe, oku tenda esitabelo no tifo no ibi no aanu.

¹⁸ Kakuli kanyi yonyene aba ana kuyanda ni kwetekiwa kame atwesa okutusa awo aetekiwa.

3

Jesu Wa Kuneneba okubita Mushe

¹ Cwalehe, anyi abaange no kukena, anyi mu tabelwe ku kwisanwa na ku wilu, mu lemuhe Jesu, omutumiwa ni mupulisita mukulu no tumelo yetu eyi twamba.

² Na kusepahala kwa woyo ona kumu keta, kanyi ngeeso Mushe aba ana ku sepahala mu ndoo ya Nyambe.

³ Kakuli Jesu kame akutekiwa onene mu kanya eyi ibita Mushe kanyi omuyaki no ndoo aba akutekiwa onene okubita endoo.

⁴ Kakuli endoo einjili ni injili kame ili ni munu ona kwiwaka, kono omuyaki no inu yonje Nyambe.

⁵ Cwale Mushe kame ana ku sepahala mu ndoo ya Nyambe kanyi omubika, aba ana ku paka einu eyo ina ku fanena okwambiwa kulubala.

⁶ Kono Kilesite na kusepahala mu ndoo ya Nyambe kanyi Omwana. Cwale aci kame tuli asindoo yaye nji kame toongoteta mu tumelo yetu ni ukukumusa mu sepo yetu.

Emamela Kwawo no kwa Pumena

⁷ Abakulingeso, kanyi Emebo No Kukena aba yamba nji,

“Balelo aba mu yupa eliywi lyaye,

⁸ mu lese oku tatafaza emicima mu ku futuka,
kanyi ba liywaa liya mu na kwetekiwa
mu lihalaupa.

⁹ Omo anjekulyenu aba ana ku neteka,
mi kame ana mono emisebezi yange ba
myaka makumi anee (40).

¹⁰ Mulibakaelyo kame nina kutinisiwa ku lusika
olo ni kwamba nji,
‘Kame ayauluka enako yonje mu micima yoo,
Mi kasi limuka etindila tange.’

¹¹ Kanyi aba ni kweta mu kutweba kwange nji,
‘Ka tamba okwingena mu pumulo yange!’ ”

¹² Abaange mu tokomele, omunjili kwaayi alese
okulumelela okwiiba ni mucima no kwapumena
okumi twaletela okutunda kwa Nyambe no ku
yoya.

¹³ Kono mu kususuweze omunjili ku munjili mu
liywaa ni liywaa, konji fela aba liisaniwa balelo,
nji kuulwe kwaanyi woyo so tatafala omucima mu
ku komiwa ku sibi.

¹⁴ Kakuli kame tuku tabela mwa Kilesite, konji
aba satuleme etumelo yetu no weli mu koongola
okutwala ku mamananeno.

¹⁵ Eileminwe okwambiwa nji,
“Balelo aba mu yupa eliywi lyaye,
mu lese oku tatafaza emicima yenu,
kanyi mu kufutuka kwenu.”

¹⁶ Anyine awo ana kuyupa mi sebeli amu
shamaeta okumulwisa? Kasa nji neli onje awo
ana ku tunda mu Egepita munji no ketelelo ya
Mushe?

¹⁷ Mi anyine awo ana kutinisa Nyambe emyaka ina kukwana makumi anee? kasa nji neli awo ana kutenda esibi awo etinyutu too natikukwela ni kufa mu lihalaupa?

¹⁸ Mi kwa nyine awo ana kwetela nji katamba okwengena mu pumulo yaye, kono neli kwawo ana kuulwa oku mukuteka.

¹⁹ Cwale kame tumona nji kasi kutwesa okwingena kakuli kasi kupumena.

4

Epumulo no Anu a Nyambe

¹ Cwalehe, abo esepiso no kwingena mu pumulo yaye aba isiliko, tu cile, mwendi anjili mwaanyi mba atuliwa ba ku kwangwa oku keela bo.

² Kakuli eyambo no kuwaba eyo, nai kwiiya kwaaci, kanyi omo unakwiyela kwa onyene. Kono eliywi ana ku yupa kali sikwa tusa esinjili, kakuli kalisikuwana ni tumelo kwawo anakuliyupa.

³ Aci asi kupumena, kame tu ingena mu pumulo yaye, kanyi omo anambebe nji, “Kame ni na ku nungu oluci mu kutweba kwange nji, ‘Katamba okwingena mu pumulo yange!’”
simba nji emisebezi yaye naba ina kubwa oku tundebele ku matatekelo no elitunga.

⁴ Kakuli kame kuli abanjili aba ana talusa eliywaa no utanu ni twiili (7) nji, “Nyambe kame ana pumula ku misebezi yaye yonge mu liywaa no utanu ni twiili (7).”

⁵ Mi kame musibaka esi kame anamba nji, “Ka tamba okwikala mu pumulo yange.”

⁶ Cwale kakuli kusi siyalile esibaka no aanu anjili okwingenamo, mi awo ana kusepisiwa oweli kasi ingena, mulibaka no kwa pumena,

⁷ Nyambe na ku suma eliywaa linjili kame nji, “Balelo,” mi sebeli olyamba mwa Dabida, aba kuna kubita enako no kuleba, omo kuna kwambeliwa kale,

“Balelo, aba mu yupa eliywi lyaye,
mulese okutatafaza emicima yenu.”

⁸ Kakuli nji Joshuwa, kambe kame ana kwaaba epumulo, kambe Nyambe kasi kwamba eliywaa lindina.

⁹ Abakulingeso, kame kusili ni pumulo no liywa no utanu ni twiili eyi isiyalele aanu a Nyambe.

¹⁰ Kakuli woyo oingena mu pumulo ya Nyambe, kame apumula ku misebezi yaye kanyi Nyambe omo apumulele ku yaye.

¹¹ Cwalehe tulwele okwingena mu pumulo eyo, nji kuulwe omunjili okukwangwa mundila imweya no kwa pumena.

¹² Kakuli eliywi lya Nyambe nilya kuyoya ni maata, lya kutweba okubita omukwale no kutweba ku maneku ayili mi kame li cuula oka keela ku matabelo no mebo ni mucima, ni ku mawaneno no ifuba ni ku mooko, mi kame lyatula mu wangu amaikuto ni minahano no mucima.

¹³ Mi balubala lwaye kakwisa esumbiwa eso siku shwekile, kono yonje kame ili aba nolikena ni kumonahala ku miyo aye woyo satuku tambwele twenyene kwa yonyene.

Jesu Omupulisita Omukulu

¹⁴ Cwale aba tuli ni mupulisita omukulu, woyo ona ka kubita mu mawilu, yonyene Jesu Omwana Nyambe, tuongolele mu kwamba etumelo yetu.

¹⁵ Kakuli woyo tuli naye, kasa mupulisita mukulu woyo no kwatu yupela okukola mu mifokolo yetu, kono yonyene woyo mu ndila yonje na kwetekiwa kanyi aci, kono yo kakwite sibi.

¹⁶ Cwale tu shetete mu undume inene ku lubona lwa Nyambe no sishemo, nji tu tambule amakeke ni sishemo mi tu tusiwe mu nako eyi ifanena.

5

¹ Kakuli omupulisita omukulu yonje ona ketiwa mukaci no aanu na bekiwa nji aimanene aanu kwa Nyambe, okulita etimpo ni itabelo mulibaka no ibi.

² Kame atwesa okutenda osimacaba naa ayauluka ni kwayupisisa kakuli ni yonyene kame afokola.

³ Mulibakelyo kame anungilwe okulita esitabelo no ibi yaye kanyi eyo no aanu.

⁴ Mi kakwisa omunu otwesa okuketa nuukuba elikute yonyene, kono kame ana isaniwa kwa Nyambe kanyi Aluni omo ana kwisanenwa.

⁵ Cwale ni yonyene Kilesite ngeeso, kasi ku kununeka yonyene nji aku tende omupulisita mukulu. Kono kame ana beekiwa kwa yonyene woyo ona kwamba kwa yonyene nji, Tiwe mwanange,

kame nina tende sitowe balelo.

⁶ Kanyi omo ana kwambela kame mu sibaka sinjili nji,

“Tiwe omupulisita na mu tinako no kwabwa,

kanyi omo ana kutendela Melekisendeki omupulisita.”

⁷ Mu maywaa no unu waye Jesu sebeli olapela ni ku kumbela ni kukuwa onene ni myoti, kwa yonyene woyo otwesa okumu yoyisa okutunda mu lifu, mi nakuyupiwa kwa Nyambe mulibaka no ulapeli waye.

⁸ Simba nji neli Mwana, na ku kwiyeta elikute okubitela mu mayando ana ku yanda.

⁹ Mi cwale aba anaku tendiwa woyo no ku petahala, sebeli otenda amatatekelo no kuyoyisiwa no kwabwa kwawo onje amukuteka.

¹⁰ Nyambe na kumu beeka omupulisita mukulu kanyi omo ana kwikalela Melekizedeki omupulisita.

Etemuso mulibaka no kusiya Etumelo

¹¹ Mulibaka no eyi kame tukwite eino kupula no kwamba kono yaku bambaba okwitalusa, kakuli kame muna kesheba kukuyupa.

¹² Kame munafanene okutenda aiyeti ba nako ino, mu si saela omunu oku miyeta kame amatatekelo no tituto ta maywi a Nyambe. Kame mu saela amawe, kasa eilya no kongola.

¹³ Kakuli omunu yonje woyo oyoya ba mawe osikwiyeta mu liywi no kuluka, kakuli osili mwanukana.

¹⁴ Kono eilya no kongola yaa kulu, awo akwiyetile oku keta eino kuwaba kweyi no kwiiba.

6

¹ Cwalehe tute kuuso kututo no kukula mu tingana mi tusiye etituto no liñusa no ulapeli. Tulese okusuma kame omutomo no kufutuka okutunda

ku misebezi na mbulwa tuso kono tupumene mwa Nyambe,

² nou no tuto no tikolobezo ni kubeeka amaoko, okwinguka nwaafu ni katulo no kuta oku no kwaabwa.

³ Cwale esi mba tu sitende nji Nyambe mba sipumenene.

⁴ Kakuli ka ku twesahala kame okuukela ku kubaka awo ana ku monyekelwa kamweya awo ana eteke empo na kuwilu mi kame ana tabelwa ku Mebo No Kukena,

⁵ mi kame ana eteke ouwa no liywi lya Nyambe ni maata no mamameneno awo aiya.

⁶ Nji nakwi mutumelo yoo, kakutwesahala okwauka ku kubaka kame kakuli kame angongotela Omwana Nyambe kame ba mubonda woo ni ku mwenisa patalaza.

⁷ Kakuli omumbu ona lokiwa onene ku mbula eyo ina ku lokeliwabo ni ku lita eimena no kulya eyo itusa awo ana ilimi mba utambula embuyoti okutunda kwa Nyambe.

⁸ Kono nji kame ubeka emikona ni moopu, kaukwite tuso mi kame oli bebi ni kukutiwa amameneno kame so ciñiwe ni mulilo.

⁹ Asingiwa, ababo twamba ngeso mu taba yenu, kame tu kwela kweyi no kuwaba eyo iyoyisa.

¹⁰ Kakuli Nyambe kakwite saluluti, nji a pulame emisebezi yenu, ni lilato eli muna monisa kwa yonyene muku tusa aanu a Nyambe no kukena eyo mane mu sitenda.

¹¹ Mi kame tulakaza nji omunu yonje mwaanyi amonise okutukufalelwa okulemuha esepo no kwiyala okutwala ba mamameneno.

¹² Nji cwale mulese okutenda ano kububa, kono mufanikete awo ana wana oku yola etisepiso, mu tumelo ni kutatelela.

Esepiyo ya Nyambe no Niti

¹³ Kakuli Nyambe aba ana kuba Abulahama esepiso, kakuli kakwisa omunjili no kuneneba woyo saetele sebeli okweeta yonyene.

¹⁴ Seli wamba nji, “Luli mba niku fuyola mane ni kupulisetwa.”

¹⁵ Mi cwale Abulahama sebeli otatelela mu kongola, mi sebeli obiwa esi ana ku sepisiwa.

¹⁶ Kakuli aanu kame aeta mwa woyo no kuneneba okwa bita, mi oku nunga oluci no ngeso ku mamananeno kame lulita okumana etiñananyi.

¹⁷ Cwale Nyambe aba alakaza oku monisa omulelo waye onene kwawo sa yole esanda no sepiso nji kautamba oku futuka, kame aongoteteta ni luci,

¹⁸ nji cwale mu inu yiili eyi no kwafutuka mwa yonyene nji Nyambe ka twese okwamba amapwa aci tute kusicilelo ku ku yoyisiwa kame tu fanena okwikala ni susuwezo inene tuleme mu kongola esepo eyi ibekilwe balubala lwetu.

¹⁹ Kame tu kwite esi kanyi eniti ni kongola no linjanga no wato no moyo esepo eyo ingena mukaci no lwambi no sisilelezo konji ku linjaliya.

²⁰ Omo Jesu ana ku tangetele kanyi omutwaleteli mu kutwimanena, ana beekiwa okutenda omupulisita mukulu okuta oku no kwaabwa kanyi omo ana kuikalela Melekizendeki omupulisita.

7

Melukizendeki Omupulisita

¹ Kakuli uyu Melekizendeki ombumu wa salemu omupulisita wa Nyambe oli beulu, sebeli okuwaniketa ni Abulahama yo uka okutunda mu kwibaa aambumu mi sebeli omu fuyola,

² mi kwa yonyene Abulahama sebeli omuba esi no likumi ku inu yonje. Yo no weli oku tolokiwa elitina lyaye nj, “Ombumu no kuluka” mi kame yo mbumu wa Salemu, okutalusa nj, “Ombumu no kozo.”

³ Melekizendeki kakwite sitaye simba inawaye, simba olusika mi kakwite amatatekelo no maywaa simba amamaneneno no moyo, kono kame afekile Mwanaye Nyambe sebeli otwalelela oupulisita okuta oku no kwaabwa.

⁴ Ko mumone okuneneba kwaye, Abulahama onjekulyetu no kulimukiwa onene sebeli omuba esi no likumi ku inu ana kuhapa.

⁵ Mi awo aana a Lebi atambula oupulisita kame ana biwi etaalo mu mulawo okushimba eyi no likumi kwaanu eyo itunda kwa boo, simba nj nonyene aa kame atunda kwa Abulahama.

⁶ Kono uyu mulume no kwatunda ku lusika loo na ku tambula eyi no likumi okutunda kwa Abulahama ni ku mu fuyola, woyo yonyene ona kutambula etisepiso.

⁷ Abo kakwisa oku hakanyeha nj woyo oba embuyoti wa kuneneba kwa woyo otambula embuyoti.

⁸ Bano eyi no likumi kame itambuliwa kwaanu afa, mundila injili woyo ona itambula yonyene kame apakiwa nj kame ayoya.

⁹ Cwale omunjili mba fanene okwamba nji Lebi yonyene woyo otambula esi no likumi, na teneke esi no likumi okuta mwa Abulahama.

¹⁰ Kakuli abo Melekisendeki aba ana kukuwana ni Abulahama, Lebi yosili mu lipumo lya njekulyaye.

¹¹ Cwale nji okupetahala kame kuna sumiwa ba upulisita no lusika lwa Lebi kakuli munji no upulisita ou, aanu kame atambula omulawo, cwale kautokwa owo oli bo okubeeka omupulisita omunjili kanyi Melekizendeki mu upulisita, okubita omunjili ona isaniwa kanyi Aluni?

¹² Kakuli aba kuna futuliwa mu situlo no upulisita, kame ku fanena oku futuliwa ngeso mu mulawo.

¹³ Kakuli omunu woyo twamba eyaye niwa mushobo mundina, mi kakwisa omunu no mushobo owo ona sebeze ba aletale.

¹⁴ Kakuli kame kulimukiwa nji Ombumu wetu kame atunda mu mushobo wa Juda, mi owo ouli omushobo ana ku ulwa okwambabo esinjili Mushe kweyi no upulisita.

Omupulisita Omunjili okufekile kanyi Melekizendeki

¹⁵ Mi etaba eyi kame imonahala eniti luli ni ku bitelela, ababo ku neyi kame omupulisita omunjili woyo okufekile ni Melekizendeki.

¹⁶ Woyo ona beekiwa oupulisita, kasa okukumana mulibaka lya njekulyaye, kono mulibaka no maata no moyo no kwaabwa.

¹⁷ Kakuli na ku pakiwa eyaye nji, “Tiwe omupulisita okuta oko no kwaabwa, kanyi omo anakutendela Melekizedeki.”

¹⁸ Cwale ku lineku linjili, na ku beekiwa kunyonga omulawo no weli, mulibaka no kufokola mane ni kuulwa etuso kwawo.

¹⁹ Kakuli omulawo kausitenda esinu no kupetahala, kono mu sibaka sawo kame ku neyi esepiso no kuwaba luli, eyi itu sheteta abeebi kwa Nyambe.

²⁰ Mi eyo ka isi tendiwa oku nambulwa okweeta.

²¹ Kandi a pulisita nakunyima kame ana bekiwa oku ulwile okweeta, Kono Jesu kame ana bekiwa mu kweeta nji,

“Ombumu na ete,

mi ka tamba kufutuka mu minahano yaye, Tiwe omupulisita no tinako no kwa abwa.’ ”

²² Esi kame simonisa nji, Jesu kame atendile opaki no oulikani ou ubita ou no weli.

²³ Aapulisita nakunyima neli ano kupula, kakuli elifu na li kwa kwangwisa okwikala enako ba musebezi no upulisita.

²⁴ Kono yonyene kame aikala mu tinako no kwaabwa mi cwale mbatende omupulisita okuta oku no kwaabwa.

²⁵ Mulibakelyo, kame a twesa oku yoyisa munako yonje ao aiya beebi kwa Nyambe mwa yonyene, yo yoya enako yonje okwa lapelela.

²⁶ Mi kame kutu lukela nji twikale ni mupulisita no ngeso, no ku kena, woyo no kwanyazahala, woyo oku tabile naa sikutenda eibi, woyo otulekilwe beulu no mawilu.

²⁷ Katende kanyi omu ana ku tendela apulisita anjili no akulu, mu liywaa ni liywaa oku lita amatabelo, oweli saye mulibaka no ibi yaye, bokame kame alita eino sicaba. Esi, kame ana si tende ka

mweya mi na kubu, enako ana kutende esitabelo yonyene.

²⁸ Niti luli omulawo kame u beeka ba upulisita no ku neneba aanu no ku fokola, kono eliywi nokweeta elyo lineyi oweli okubita omulawo, kame libeeka Omwana woyo onatendiwa no kupetahala okuta oku no kwaabwa.

8

Jesu Omupulisita Omukulu no Ulikani no Ubya

¹ Cwale etaba no mu yambo twamba ninji kame tuli ni mupulisita omukulu, woyo oli ku Lyoko no silyo no lubona no maata onje ombumu mu liwilu.

² Omubeleki mu sibaka no kukena ni tende no niti eyo kaisisumiwa mu maata no munu kono a Mbumu.

³ Kakuli omupulisita omukulu naketiwa nji abe etimpo ni itabelo mulibakaelyo kame ku fanena nji uyu omupulisista mukulu ni yonyene ngeso alite esinjili no nubu.

⁴ Cwale nji osili bano ba litunga, kambe katendile omupulisita kame kakuli kwaali apulisita awo atundisa etimpo okukumanena ni mulawo.

⁵ Alemine okutenda emisebezi eyi ili esifekiso ni mwiinda naku liwilu, kakuli abo Mushe yo saela okuyaka etende, kame ana ku lalelwa kwa Nyambe aba ana kwamba nji, “Omone nji kame otenda einu yonje okukumanena ku inu eyi ona kumonisiwa ba lilundu.”

⁶ Kono kanyi omo kwikalele, Jesu na biwi esitulo eso no utokwa onene okubitelela eyi no kale kanyi oulikani aimanena ni wakuwaba, kakuli kame ina beekiwa ba tisepero no kuwaba.

⁷ Kakuli nji oulikani no weli kambe kawa si nyaziwa, kambe kakwisa esibaka no ulikani no wiili.

⁸ Kakuli Nyambe na wana oufosi kwa onyene aba amba nji,

“Amaywaa kame aiya, kame kwamba Ombumu,
Aba sani kuleme oulikani no ubya na sindoo ya Isilaele na sindoo ya Juda.

⁹ Kasa kanyi oulikani ni na ku kulema na njeku lyoo,

ba liywaa aba nina kwalema ni Lyoko okwa twaletela okwatundisa mu naha no Engepita.

kakuli kasi ku twalelela mu ulikani wange,
mi cwale kanisi kwaateteta, kame kwamba Mbumu.

¹⁰ Cwale, ou wo kame oulikani sani kuleme na sindoo ya Isilaele

munyima no maywaa awo, Kame kwamba Ombumu.

Kame sani ingenyeke emilawo yange mu tingana too,

ni kwiñola ba micima yoo.

mi kame sa ni tende Nyambe woo,

mi onyene atende aanu ange.

¹¹ Mi katamba okwiyeta omunu yonje ni mwabaye,

simba omunu ni minaye okwamba nji,

‘Olimuke Ombumu.’

kakuli onje mbani limuka,

okutangisa ku mwanukana okutwala ku mukulu.

¹² Kakuli kame sani ikale ni makeke ku uyi woo,
mi kani tamba oku puluka eibi yoo kame.

13 Mu kwamba oulikani no ubya, kame aamba owu no weli nji kaukwite tuso, mi esi sihonehile niku kuulwa etuso kame sili bebi ni kubwa.

9

Elitunga ni Liwilu kame Ilumbeka

¹ Cwale oulikani no weli ni wonyene kame una kwikala ni milawo no sebelezo no kulumbeka ni sibaka no kukena namu litunga.

² Kakuli kame ku naku yakiwa etende, eyi no kuleba, omo kuna kwikala olutala no lambi ni tafule ni sinkwa no aana a Mbumu kame sina kwiisaniwa nji Esibaka no Kukena.

³ Mi ku linjaliya no lwambi no wiili kame kwimanine etende isaniwa nji Esibaka no Kukena Onene.

⁴ Omo kame kuna kwikala ni aletale no gauda eyi iciñelwa ensense, ni aleka no ulikani eyi ifuk-ilwe egauda ku maneku onje eyo ikwite aleka no gauda kame ku na ku bekiwa akacoo no gauda aka kali ni maana, mi omulamu wa Aluni ona kushoshela amamuna ni matapa no mawee no kupatama bañolilwe oulikani.

⁵ Beulu kame kuna kwikala celabimu no kanya eyi iukumele esitulo no makeke, eyi no inu eyo katutwese okwamba mu utungi.

⁶ Einu eyo aba ina lukisiwa ngeso, apulisita sebeli atwalelela okwingena mu tende no weli alemine okutenda eyi no misebezi yoo.

⁷ Kono mu tende no wiili, konji omupulisita mukulu yo ingenamo kono kamweya mu mwaka mi okuulwile okwashimba ounyinga owo atenda esitabelo sa yonyene ni sa ufosi no aanu.

⁸ Mweyi, Emebo No Kukena kame ina monahalisa nji endila no ka ingene mu Sibaka no Kukena onene kaisi yatuluka kale kakwisa taba okumona nji etende no weli isi imanine.

⁹ Eyi itendile esisupo no nako no bano. Okukumanena ni tukiso eyi, etimpo ni itabelo eyo ibiwa kaitwese okupetahalisa elizwalo no asikulumbeke,

¹⁰ kono kame itendiwa feela ni ilya ni kunwa ni inu no kupula eyi ifanena olutu no unu okutwala ba nako no kufutuka no ubya.

¹¹ Kono Kilesite aba ana ku monahala yooli omupulisita mukulu no inu no kuwaba eyo in-eeyi, cwale mu kuneneba ni tende no kupetahala onene eyo nokwayakiwa ni maoko eyi itendile nji kasa no litunga lino.

¹² Cwale Jesu kame ana kwingenangamo kamweya feela mu Sibaka no Kukena yo kashimbile ounyinga no tupuli ni tunamani kono ni unyinga waye owo ulita etiululo no kwaabwa.

¹³ Kakuli nji okukwawiwa no aanu no kwakena ni unyinga no tupuli ni tiñundi ni mute no kanamani no sitole no ngombe esitabelo no kukenisa olutu,

¹⁴ ngasibine sakwikale ku unyinga wa Kilesite! yonyene mu Mebo no kwaabwa, naku kutenda esitabelo no kwa nyazahala kwa Nyambe, nakenisa elizwalo lyenu okutunda ku misebezi no kufa nji tu sebeleze Nyambe no kuyoya.

¹⁵ Cwalehe Kilesite yo mwimaneni no ulikani no ubya, nji cwale awo ana isaniwa atambule okuyoola esanda ana ku sepisiwa kakuli elifu lina

kutendahala na likwaa liulula okutunda kwiinu no kwiiba ina kutendiwa mu ulikani no weli.

¹⁶ Kakuli abo aba kuli oupaki no kuñoliwa, elifu lya woyo ona iñolo kame lifanena oku pakiwa.

¹⁷ Kakuli oupaki kame osebeza ba nako no lifu, kakuli kakukwite amaata abo woyo ona tende ngeso yosiyoya.

¹⁸ Mulibakelyo oulikani no weli ni wonyene kausi kutendiwa no kwa ulwa ounyinga.

¹⁹ Kakuli Mushe aba ana ku mana okuba eti-taelo tonje no mulawo kwaanu onje, sebeli os-himba ounyinga no tunamani nou no tupuli okuwaneka ni meyi, ni wanda ona basiwa omu-caa, ni haisopu sebeli okwaa ebuka no mulawo bamweya ni aanu onje.

²⁰ Cwale sebeli wamba nji, “Ou ounyinga no ulikani ana ku laela Nyambe kwaanyi.”

²¹ Cwale ni mundila imweya sebeli okwaa etende ounyinga bamweya ni inu yonje ana kuku-tusisanga mu kulumbeka.

²² Niti luli, munji no mulawo kainu yonje ina kukenisiwa ni unyinga, mi aba kuulwile okwiita ounyinga kakwisa okulemenwa no ibi.

Esitabelo sa Kilesite kame situndisa Eibi

²³ Abakulingeso, na ku kufanena okufaniketa eyi na ku liwilu aba ina ku fanena oku kenisiwa mu mukwa owo, kono eyi na ku liwilu ikenisiwe ni matabelo abita ano.

²⁴ Kakuli Kilesite kasi ingena mu Sibaka No Kukena esi sitendilwe ni maoko, so nyene esifek-iso sa woyo fela no niti, kono na ingene mu liwilu lyonyene, nji cwale akamonahale balubala lwa Nyambe mu kutwimanena.

²⁵ Simba kasa nji aku tende esitabelo mu kuukela, kanyi omupulisita omukulu aba aingena mu Sibaka No Kukena mu mwaka ni mwaka, yo lemine ounyinga ou utendile nji kasa waye,

²⁶ kakuli cwale kame ana yanda aka no kupula okutunda ku matatekelo no litunga. Kono kanyi aba kulingeso, na kumonahalanga kamweya nakubu ku mamneneno no nako okutundisa esibi mu ukutenda esitabelo yonyene.

²⁷ Cwale kanyi aba kuna laelwe nji aanu onje kame safe kamweya, munyima okubinda sa kwi-iyekatulo.

²⁸ Cwale Kilesite ona kutendiwa esitabelo kamweya okutundisa eibi no aanu no kupula kame sa monahale aka no wiili, mi kasa mu kutundisa eibi kono mu kuyoyisa awo amutatelela onene.

10

¹ Kakuli omulawo wa Mushe kame uli ni mwinda fela no inu no kuwaba eyi iya, kasa lutu luli no inu. Ka sitwese oku tenda, mu sitabelo sikufekile eso atwalelela okuba mu mwaka ni mwaka okupetahalisa awo asheteta beebi.

² Kambesi ngeso, amatabelo kambe naku lezeliwa oku litiwa? Kakuli abo aa asikulumbeka Nyambe aba ku na mana okwa kenisa, kakwite amaikuto no sibi.

³ Kono mu itabelo eyi kame kuli esi pulukiso no sibi mu mwaka ni mwaka.

⁴ Kakuli kaku twesahala nji ounyinga no tiñundi ni tupuli otwese okutundise eibi.

⁵ Mulibakelyo Kilesite enako ana kwiya mu litunga, kame ana kwamba nji,

“Ka usi singa esitabelo simba enubu,
kono kame onani lukisete olutu.

⁶ Ka uwabelelwe esitabelo no kucinyiñiwa ni
mulilo,
simba esitabelo no sibi.

⁷ Cwale kame naamba nji, ‘Kame ni neeyi,
mu ku tenda eso si singwa kwa wene, Nyambe
wange,
kanyi omo iñolelwe eyange mu buka no
muputo.’ ”

⁸ Aba ana kwamba yonyene nji, “Simba
osinga simba okutenda eyi no mwelembo mu ita-
belo ni tinubu, etinubu no kucinga ni tinubu no
sibi.” eyi kame ibiwa okukumanena ni mulawo
wa Mushe.

⁹ Cwale sebeli wekeza nji, “Nyambe, kame
ineeyi mu kutenda esi si singwa kwa wene.” Kame
ana ku tundisa eitabelo no weli nji kubekiwe esi
no wiili.

¹⁰ Mi mu libakaelyo ana kusinga Nyambe, na
tukenisiwa mu sitabelo no lutu lwa Jesu Kilesite
esi sina tendiwa kamweya mi nakubu.

¹¹ Mi omupulisita yonje kame aimana okutenda
omusebezi waye mu liywaa ni liywaa okutundisa
esitabelo no kukufeka, eso suulwa okutundisa
eibi.

¹² Kono Jesu Kilesite aba ana oukutenda esita-
belo ba nako imweya mulibaka no ibi, sebeli oka
ikala ku lyoko no silyo lya Nyambe,

¹³ oku tatelela konji abo eila yaye aba saikaten-
delwe esipula no malyatelo no makondo aye.

¹⁴ Kakuli mu sitabelo saye simweya, kame ana
tende aanu okupetahala enako yonje awo ana
kenisiwa.

15 Mi Emebo No Kukena ni yonyene kame itu pakela mu taba eyo. Kakuli munyima no kwamba ni,

16 “Ou oulikani sani kuleme noo, munyima no maywaa awo, kame kwamba Ombumu.

Kame sani beeke emilawo yange mu micima yoo, ni kwiñola mu tingana too.”

17 Cwale sebeli weekeza okwamba ni, “Ka ni tamba oku puluka eibi yoo ni uyi woo.”

18 Cwale aba kuli ouku lemena, ka kutendiwa kame esitabelo sinjili mulibaka no sibi.

Okuisana no ku Kongota mu Tumelo Mwa Nyambe

19 Cwalehe, abaange, aba tuli ni undume no kwingena mu Sibaka no Kukena Onene mulibaka no unyinga wa Jesu,

20 mu ndila no ubya ni kuyoya, eyo ana tu yatul-wele mulibaka no lwaambi okutalusa ni, mu lutu lwaye.

21 Mi simba ni kame tuli ni mupulisita munene woyo obeekelwe oku busa endoo ya Nyambe,

22 tu shetete ni micima no niti, ni tumelo no kwiwala, ni micima yetu no eyi ikenisitwe ku inu no uyi, elizwalo ni tinyutu tetu tiyowisitwe ni meyi no kukena.

23 Tuleme mukongola mu kwamba eyi no sepo yetu me tu ulwile okutantalika, kakuli woyo ona tu sepisa ni wa ku sepahala.

24 Tuku babalele omunjili ku munjili mu lilato ni mu misebezi no kuwaba.

25 Tule okukana oukuwana bamweya, kanyi omwatendela anjili, kono tuku susuweze omunjili

ni munjili onene kanyi omo mumonena nji eliy-waa lya Mbumu kame lili beebi.

²⁶ Kakuli nji kame tutenda esibi no ka mabomu munyima no ku limuka eniti abo kakwisa esita-belo sisiyalele no kulemena eibi.

²⁷ Kono tucile enako no katulo ni kutweba no mulilo owo so cinge awo asi tingananyi.

²⁸ Omunu ona ku shwaula omulawo wa Mushe, kame aibaiwa yo ka yupelwe amakeke mu upaki no aanu ayiili simba aatu.

²⁹ Ka koto ikumana babine eyo munahana eyo sawane woyo ona ku shwaula Omwana Nyambe ni ku nyefula ounyinga no ulikani owo ana kukenisa ni ku tinisa Emebo no sishemo?

³⁰ Kakuli tu mulimuke woyo ona kwamba nji, “Okuuseti ni kwa nge, time sa ni teneke.” Mi kame, “Nyambe yo soatula aanu aye.”

³¹ Oku kwela mu maoko a Nyambe no ku yoya ni sinu no ku cilisa.

³² Kono mupuluke amaywaa no weli, munyima no kumonyekelwa, kame muna kukoongota ku mayando.

³³ Abanjili kame muna kushubulwangwa epatalaza mu ku anguliwa ni ku yandisiwa, mi abanjili kame muno kutabela ku utata nwawo atendiwa ngeso.

³⁴ Kakuli kame muna kwikala ni sishemo kwawo anungilwe mi kame mu wabelelwa okutambula okusinya esifumu senu, kakuli kame mu limukile mwenyene eyi no kuwaba, esinu eso siikala okuta oku no kwaabwa.

³⁵ Cwalehe mulese okuyumba oundume wenu owo oli ni mupuzo no kuneneba.

³⁶ Kakuli kame mu fanena oku tundamena, nji cwale mutende esi si singwa kwa Nyambe ni kutambula eso muna sepisiwa.

³⁷ “Kakuli kusi siyalele enako icana,
mi yonyene woyo oiiya kame saiye
mi katamba oku liyeha.

³⁸ Kono ange ano kuluka kame sayoye mulibaka no tumelo,
mi nji kame aukela munyima,
Omoyo wange kauwabelelwa mwa yonyene.”

³⁹ Kono aci katuli kwawo aukela munyima mi kame asinyehile, kono aci kame tuli kwawo ali ni tumelo ni kuteula emyoyo yoo.

11

Etumelo

¹ Cwale etumelo eniti no inu eyo tusepa niku kolwa eyi no kwa monwa.

² Kakuli mulibaka no tumelo aanu na kukale Nyambe nakwatambula.

³ Mulibaka no tumelo kame tu yupisisa nji elitunga kame lina tendiwa ni Liywi Iya Nyambe nji cwale eyo imonwa kame ina kutendiwa okutunda ku inu nokwa moniwa.

⁴ Mulibaka no tumelo Abele kame ana ku lita balubala wa Nyambe esitabelo esi sibita sa Kaine mu sonyene ana kutambula nji wa kuluka, Nyambe kame amupaka muku tambula etimpo taye, nafu kono mu tumelo yaye osilemine okwamba.

⁵ Mulibaka no tumelo Inoki kame ana ku shimbiwa ku wilu nji aulwe okufa. Mi kasi kuwaniwa,

kakuli Nyambe na ku mushimba. Cwale yo kasi shimbiwa kale kame ana ku wabelisa Nyambe.

⁶ Mi mukuulwa etumelo ka kukonahala oku wabelisa Nyambe, kakuli woyo yonje so iiya kunyonga ya Nyambe kame afanena okupumena ni Nyambe kwaali mi kame aba omupuzo awo amusaela.

⁷ Mulibaka no tumelo Nuwe na ku lemusiwa kwa Nyambe mu inu eyo kaisiku moniwa kale. Kame ana kukuteka Nyambe ni kuyaka Aleka no ku yoyisa asindoo yaye, mulibaka no eyi Nyambe na kwatula elitunga ni kutenda omuyoli no kuluka oko kuneyi mu tumelo.

⁸ Mulibaka no tumelo Abulahama na kukuteka Nyambe abo ana ku isaniwa okutunda mu sibaka eso ana ku tambula kanyi ana kuyola mi sebeli otundamo yoka limukile oko ata ni kubine.

⁹ Mulibaka no tumelo Abulahama sebeli ofunduka okuta mu sibaka no sepiso kanyi ongenda mu sibaka eso yo yoya mu titente ni Isaka bamweya ni Jakobo ana kutambula ni yonyene esepiso imweya.

¹⁰ Kakuli kame ana kwaliketa ku muleneŋi owo ukwite omutomo mi omuyaki ni mutendi, Nyambe.

¹¹ Mulibaka no tumelo ni yonyene Sala kame ana kutambula amaata noku leya, simba ni kame ana kukulubala kakuli kame ana ku sepa woyo ona ku musepisa.

¹² Cwalehe okutunda ku mulume mumweya naba ana kumonahala kanyi nafu nakuleya olusika no kupula kanyi etitungweti na ku wilu mane kanyi oubeke no mushekesheke na ba likamba no liwate.

¹³ Aa onje kame afile mu tumelo aka si tambula eyi ana sepisiwa, kono nai mono ni kwakeeta asili oku no ku leba, mi kame ana kulimuka nji kame atunda ku ndina mi angenda ba litunga.

¹⁴ Kakuli aanu awo aamba ngeso kame a monahaza nji kame asaela enaha yoo.

¹⁵ Kambe kame ana ku puluka enaha eyo ana kutunda, kambe kame ana kuwana omukwa no ku ukela mo.

¹⁶ Kono kanyi omo kwikalele kame a shukele enaha no ku waba yonyene eyo na ku wilu. Mulibakelyo Nyambe ka enee okumwisana nji Nyambe woo mane kame anaa lukisete omuleneni.

¹⁷ Mulibaka no tumelo, Abulahama enako ana kwetekiwa, sebeli olita Isaka mwanaye mumweya oku mutenda esitabelo, mi yo kame ona kubiwa etisepiso,

¹⁸ Woyo ona kwambelwa mwa Isaka nji, “Aikulyowe kame sa isaniwe mwa wene.”

¹⁹ Seli okolwa nji Nyambe kame atwesa mane okwingula aafu mi mu mukwa umweya Isaka sebeli oukisetwa kwa yonyene, kanyi nimu kwingulwa kwaafu.

²⁰ Mulibaka no tumelo, Isaka kame ana fuyola Jakobo ni Isau, yo alemusa eyi saiye kuuso.

²¹ Mulibaka no tumelo, Jakobo aba ana kufa, sebeli ofuyola aana a Josefa ayili, sebeli olapela yo lemine ba mutwi no mulamu waye.

²² Mulibaka no tumelo, Josefa aba ana kufa, sebeli wamba eyi no kutunda kwa aana a Isilaele, mi sebeli osiya etitaelo kweyi no kupumbekiwa kwaye.

²³ Mulibaka no tumelo, Mushe aba ana leiwa, sebeli oshwekiwa kwa shemiaye etikweti taatu, mu kumona nji ni mwana no kuwaba, mi kasi cila etaelo no mbumu.

²⁴ Mulibaka no tumelo, Mushe aba ana kukula, sebeli okana okwisanwa nji mwana a Falo no mukati.

²⁵ Kono sebeli oku ketela okuyanda naanu a Nyambe okubita nji akukole eminyaka no sibi.

²⁶ Seli onahana nji okushubaulwa mulibaka no mayando a Kilesite ni sifumu no kuneneba esi sibita esifumu no Egepita, kakuli kame ana kwa liketa omupuzo.

²⁷ Mulibaka no tumelo, sebeli otunda mu Egepita, mi kasi cila oku tweba kwa mbumu, kakuli kame ana kukoongota kanyi kame amona woyo no kwa monwa.

²⁸ Mulibaka no tumelo kame ana teula epaseka ni kukwaa ounyinga, nji cwale esisinyi no aana no aeli silese okwalema.

²⁹ Mulibaka no tumelo aanu sebeli aluta eliwate no mucaa kanyi ba likamba, kono amaengepita aba ana kweteka oku tenda ngeso, sebeli aminisiwa ku meyi.

³⁰ Mulibaka no tumelo amamota no Jeliko sebeli akwa, aba ana kumana oku tingulukwa amaywaa atanu ni twiili (7).

³¹ Mulibaka no tumelo Lahaba elihule kasi kufa nawo no kwa pumena elibaka no ku tambula amatwela mu kozo.

³² Mi eyi sa naambe kame ni ibine? Kakuli kame sa ni taelelwe enako aba sa naambe eyi ya Gidiyoni, ni Balaki, ni Samisoni, ni Jefita ni Dabida, ni Samwele, neyi nwaanuhi a Nyambe.

³³ Awo mu tumelo kame hapa emibuso kame ana sebeleze eniti, kame ana wana kweyi ana ku sepisiwa, kame ana tiki otunwa no andee,

³⁴ kame ana timi amaata no mulilo, ni ku banduka ku kutweba no mukwale, kame ana ombola ku meeti, kame ana tendiwa etindume mu ndwaa, kame ana cilisa etimpi no iila.

³⁵ Akati na tambula aafu oo mu kwinguka, anjili kame ayandisiwa ouyi, mi kame akana oku lamulelwa, nji awane okwingukela ku moyo no kuwaba ni kubita.

³⁶ Anjili kame ayandiswa muku shubulwa, ni tipafa, ni mu mawenge mane ni titolongo.

³⁷ Kame aibaiwa ni mawee, kame a patuliwa ba kaci, kame aibaiwa ni mukwale, kame ayambaela aku fukile eitumba no mikoko neyi no tupuli, kame ayanda, kame anungiwa mane ni kuyandisiwa onene.

³⁸ Onyene elitunga kali sikwa fanena, kame a yambaelisiwa mu mahalaupa, ba malundu, mu mina no kucakula ba mawee, ni mu mina eyi itungile no litunga.

³⁹ Onyene awo onje kame ana etekiwa wino kweyi no tumelo yoo, ka sitambula eyi ana sepisiwa,

⁴⁰ kakuli Nyambe kame ana ku tu monena eyi no kuwaba, nji okuulwili aci katwese okutendiwa ano kupetahala.

12

Nyambe Sitetu

¹ Cwalehe, kakuli kame tu tingulukilwe kwaanu no kupula no tipaki, tu lese yonje eyi itwimelwa,

ni sibi esi sitwiwela beebi, mi twituke mu koongota mu takano eyi ilukisitwe balubala wetu.

² Me twa liketile kwa Jesu, yonyene omutateki ni mumaneneni no tumelo yetu. Mulibaka no ku wabelelwa oko ana kubekelwa kuuso, naku koon-gota ku sifapano yo ulwile oku tokomela elishwau lyaso! mane kame aikalile ku lyoko no silyo no lubona lwa Nyambe.

³ Mu puluke woyo onaku kongota kukulwisiwa kwawo asi kutende eibi, nji cwale mulese oku kwangwa simba oku zwafiswa.

⁴ Mu utata wenu no kulwisa esibi kamu sikeela ba nako no kwiita ounyinga wenu.

⁵ Cwale kame muna pulama esusuwezo eyi mu nambeliwa kwa Nyambe kanyi aana? Eyi yamba nji,

“Mwanange, olese oku nyaziseza Ombumu aba aku kalimela,
simba okuzwafa aba obiwa ekoto kwa yonyene.

⁶ Kakuli Ombumu kame asiulula woyo asinga, mi kame aba ekoto yonje mwana woyo atambula.”

⁷ Aba mu kalimelwa nji mu koongote, kakuli Nyambe kame ami shimba kanyi aana, kana kwaali omwana no kwa kalimelwa kwa sitaye?

⁸ Nji kamu kalimelwa, kanyi omo atendelwa aana onje, cwale abohe muli aana feela mi kasamuli aana no niti.

⁹ Okwekeza kweyi kame tu kwite asitetu no litunga awo atweleza mi kame twakuteka. Cwale ikene aba katukubeeke kunji kwa Sitetu no mebo ni moyo!

¹⁰ Kakuli onyene kame ana tu kalimele ba nako no kwibiba omo anaku monena nji kame kulukile, kono Nyambe kame atu kalimela ba uwa wetu nji tu kutabele okukena kwaye.

¹¹ Kakuli enako yonje aba ku kalimelwa kame kuyupiswangwa okukola okubita okuwabelelwa, kono munyima kame ku beeka embuya no kozo no kuluka kwawo ana iyetiwa ngeso.

Etitaelo ni Titemuso

¹² Cwalehe munone amaoko enu anakwi, mi mongote amanwi enu no kwaaongola!

¹³ Mu tendele amakondo enu etindila no kooloka, nji cwale eiholet iikale wino simba okubala.

¹⁴ Mu tundamene oku yoya mu kozo naanu onje, ni kwikala ni ku kena, nji omunu kakwite okukena oko kakwisa woyo sokamona Ombumu.

¹⁵ Mu mone nji cwale kuulwe omunu so kwangwa okuwana esishemo sa Nyambe nji kuulwe omubisi no kulula so mene ni kulita outata mi mu onyene aanu no kupula kame sasilafazwe.

¹⁶ Kwaanyi ku lese okwikala woyo no wozwa nawo no kwa lapela kanyi Isau ona kuulisa etukelo no ukulu waye mulibaka no silya simweya.

¹⁷ Kakuli kame mulimukile nji kuuso aba na shukela oka yoola embuyoti, kame ana kukaniwa kakuli kasi kuwana esibaka no kubaka simba nji na kwimona ni myooti.

¹⁸ Kakuli kamu siiya kweeso si twesiwa oku lemiwa, esi sibya omulilo, simba ouwi, ni kweena, niku liñungwa.

¹⁹ Ku mulumo no tolombita, ni liywi elyo amaywi alyo kame litenda awo analiyupu okukumbela nji kulese okwikala amañusa sa ambiwe kwa onyenye.

²⁰ Kakuli kasi kukoongota mu taelo eyo ina kubiwa nji, “Simba esiyamana kame silema elilundu, mbasi pwacauliwa ni mawee.”

²¹ Niti luli kame sina kumonahala eso Mushe ana kwamba nji, “Kame ninjanjata ni kucila!”

²² Kono na mwiya ku lilundu no Sione ni ku muleneñi wa Nyambe no kuyoya, Jelusalema naku wilu ni ku mangeloi aa aku wanine aa atenda eikiti-kiti okupula.

²³ Ni ku kopano no aana no aaeli awo ana ñoliwa mu liwilu, ni kwa Nyambe omwatuli no aanu onje ni ku mebo no aanu no niti awo ana tendiwa asiku patehala.

²⁴ Ni kwa Jesu omwimaneni no ulikani no ubya, ni ku unyinga waye ou tuna kwaiwa ou wamba eyi no kuwaba onene okubita ounyinga wa Abele.

²⁵ Mumone nji mulese oku kana woyo wamba. Kakuli nji kasi kubanduka aba ana ku mukana woyo ona kwalemusa ba litunga, cwale aci ngasibine satu banduke nji kame tukana woyo wamba okutunda ku wilu!

²⁶ Eliywi lyaye nali nyanganyisa elitunga, kono bano na sepisa nji, “Kame kani tamba oku nyanganyisa elitunga feela kono mane ni liwilu.”

²⁷ Amaywi aa, “Kamweya kame” okumonisa okutundisiwa no inu eyo inyanganya kanyi omo ina ku tendelwa, nji cwale eyo nokwa nyanganya kame saisiyale.

²⁸ Cwalehe tuku tumele kakuli natu tambula omubuso owo nokwa nyanganya mi tube kwa Nyambe okulumbeka oko kutambuliwa me tuli ni likute ni kucila,

²⁹ kakuli Nyambe wetu ni mulilo ou usinya.

13

Omo Kuwabelisetwa Nyambe

¹ Mulesele elilato no munu ni minaye simba mukulwaye litwalelele.

² Mulese oku ketulula okutambula angenda. Kakuli anjili kame ana tambula amangeloi mu kwa limuka.

³ Mu puluke awo ali mu tolongo kanyi naanyi kame muli mu tolongo ni onyene nawo ayan-disiwa onene, kakuli naanyi musili mu lutu.

⁴ Mulesele amakwala akutekiwe kwaanu onje mi mulesele omumbeta no likwala uulwe elitilo kakuli Nyambe mba atula amahule nasi kubuka.

⁵ Mutundise omoyo wenu ku kusinga amali mi moongotete kweyo muli nayo kakuli Nyambe kame anamba nji, “Sitamba kuku lesela, simba okuku fulalela.”

⁶ Abakulingeso, kame sa twambe ni mucima ou ongolile nji,

“Ombumu yo mutusi wange,

Sitamba kucila.

Iikene eso satende omunu kwa mene?”

⁷ Mu puluke awo amyendisa, awo ana myambele eliywi lya Nyambe, mu lemuhe amamaneno no moyo woo, mi mu fanikete etumelo yoo.

⁸ Jesu Kilesite yokame ni bingolwa, ni balelo, ni kuta oku no kwaabwa.

⁹ Mulese oku kelusiwa ku tituto no kupula naku ndina, kakuli esi no kuwaba ni mucima aba ukongota ni sishemo sa Nyambe, kasa oku tokomela eyi iliwa, kakuli awo ata nayo katusiwa esinjili.

¹⁰ Kame tuli ni Aletale yetu, mi awo asebeza mu tende, ka kwite etukelo no kulya eyayo.

¹¹ Mupulisita omukulu aba alita ounyinga no iyamana mu Sibaka no Kukena oku utende esitabelo mu libaka no ibi, etinyutu no iayana kame ika ciñelwa kundee no mafulo.

¹² Cwale Jesu ni yonyene naku yanda kundee no mwelo mulibaka no kukenisa aanu ni unyinga waye.

¹³ Cwalehe, tu banene kwa yonyene ku ndee no mafulo, me tu shimbile oku shubulwa kwaye.

¹⁴ Kakuli kuno ka tu tende omuleneñi no kwaabwa, kono kame tu saela omuleneñi owo sa wiye.

¹⁵ Cwale mwa Jesu tulitele Nyambe esitabelo no milumbeko, eso ninji embuya eyo itunda mu tunwa oto tu lumba elitina lyaye.

¹⁶ Mulese okwatenda eyi no kuwaba nuukutabela eyo mukwite na kwenu kakuli eitabelo eyo kame iwabelisa Nyambe.

¹⁷ Mukuteke awo amyendis, mi muku beeke kunji yoo, kakuli kame atonena Emyoyo yenu, abakulingeso kame sa ibangutwe yayo. Mwalese atende eyi mu kuwabelelwa kasa mu kweena kakuli eso kasitamba oku mi tusa esinjili.

¹⁸ Mu tulapelele kakuli kame tu kolwa nji elizwalo lyetu ni lya kuwaba, ni nji mu inu yonje kame tu singa oku tenda esi si lukanela.

¹⁹ Kame ni kumbela onene luli nji mu tende ngeso, nji nusetwe kwaanyi muwangu.

Etapelo no ku yatila

²⁰ Cwale Nyambe no kozo yonyene uyu una usu kwa afu Ombumu wetu Jesu, omulisani no mikoko, mu unyinga no ulikani no kwaabwa.

²¹ Ami tende ano petahala mu misebezi no kuwaba yonje, nji mu tende esi singwa kwa yonyene asebeze mu micima yenu eyo imuwabelisa mu miyo aye mwa Jesu Kilesite, ekanya ikale kwa yonyene okuta oku no kwaabwa. Amen!

²² Abaange, kame ni kumbela nji mu tambule wino amaywi no kutazo eyo, kakuli eliñolo ni mi ñolela ni lya kwibiba.

²³ Mu limuke nji omwabetu Timoteya, na lukululwa mu tolongo aba sa iye wangu mba ni ka mi mona naye.

²⁴ Mukeete awo amyendisa onje, naanu a Nyambe no kukena onje. Awo atunda mu Italiya kame ami keeta.

²⁵ Esishemo si ikale naanyi moonje. Amen

Luyana Bible Translation
Luyana: Luyana Bible Translation (New Testament)
for Zambia

copyright © 2024 The Word for the World International

Language: (Luyana)

Contributor: The Word for the World Southern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-10

PDF generated using Haiola and XeLaTeX on 10 May 2025 from source files dated 10 May 2025

b071328c-adc7-5e91-a867-254a1a2a7440